

Ta hobennan por plama simiyanan pa paz na Aruba y rond mundo



ORANJESTAD— Alumnonan di klas 6 di Pius X School y Commandeur Pieterboer School a duna honor na Dia Mundial di Paz durante un ceremonia na e Monumento Anne Frank. E ceremonia tabata organiza pa Fundacion 'Respeta Bida, Semper Corda,' cu no a laga e dia mundial aki pasa sin mas. Y a scohe pa enfoca riba hobennan riba e dia aki pa nan por sigui plama e mensahe di paz.

Segun Presidente di e Fundacion Diana Pietersz Gonzalez, e Fundacion kier promove respet pa otro, pa tur hende biba cu otro den paz, aunke cu no tur hende ta di e mesun nacionalidad, religion of pensamiento. "Nos fundacion ta kere cu boso ta hopi importante, pasobra boso ta nos futuro. Aruba lo bira loke boso lo haci di dje." Y aunke cu na Aruba no conoce guerra, ta un hecho

cu tin hopi pleitamento y te hasta hende cu ta bringa cu otro pa diferente motibo. Paz ta cuminsa cu respet y cariño pa otro, den famia, na cas, den bario y na scol. "Paz por sosode den bo bida diario. Nos kier corda boso pa semper biba den harmonia cu otro," Diana Pietersz Gonzalez a sigui bisa.

Maybelline Arends Croes y su coro Tutti Frutti tabata presente pa hunto cu e alumnonan di e dos scolnan canta diferente cantica cu mensahenan cla pa paz, y despues di e canticanan aki, hobennan Osbaldo Corea y Liziana Maldonado, bou guia di Muñe Oduber Winklaar a declama storianan di e matanan cu a keda planta awe, cu ta hopi inspirativo. E mata di Olijfie por ehempel pa miles di aña ta simbolisa pas, mientras cu e mata Carob ta produci hopi sombra y te hasta un fruta popular na Israel en particular. Cada alumno a haya un saco di gorduro pa pone na e dos matanan planta.

Den opinion di e Fundacion, a scohe pa e simbolonan aki, pa motibo matanan ta



representa bida na mundo. "Matanan ta nos amigo. E matanan cu nos lo planta lo crece bira grandi, duna fruta y sombra, Y aki 10 aña cu boso ta bira grandi, boso ta bin cu boso yiunan y disfruta di nan cu boso yiunan," ta locual e hobennan a scucha.

Despues a sigui un actividad di obra di man den Renaissance Convention Center, unda e alumnonan a traha palomanan di papel, cu nan nomber skirbi cu despues lo keda colga den un mata na Biblioteca Nacional. Hunto cu e palomanan di papel, e hobennan a skirbi un carta pa ex-

presa nan ideanan pa un miho Aruba y e Fundacion a keda cu e responsabilidad pa entrega e mensahe di e hobennan na esnan cu ta dirigi nos pais.

E Fundacion, cu ta consisti ademas di Martha Lichtenstein, Jose Fernandez Perna, Gwennan Boekhoudt, Sharon de Cuba, Shade Cybul y Joan Hart, ta spera cu e evento di riba Dia Mundial di Paz, berdad lo keda colga den curazon di e como 100 hobennan, cu di nan banda, mescos cu e matanan lo plama simiyanan di paz na Aruba y rond mundo. □

